

定香亭筆談

定香亭筆談卷二

揚州阮元記

錢塘陳鴻壽錄

丙辰秋按試至嘉興與試詩人雖多尚未厭余所望
試畢將行有諸生獻其父詩南野堂集二帙舟中閱
之知爲嘉興吳澹川

文溥

所作披吟終日定爲浙中

詩士之冠關中草閩游編尤爲直逼古人澹川居湖

北汪撫軍

新

戎幕及歸浙謁余於杭州與語兩湖戎

事瞭如指掌頗具才略不可徒以詩人目之余出先
大父征苗刀示之澹川走筆作歌震奪一席

吳澹川南野堂詩

入關

前山復後山莽莽山頭月古人復今人累累山下
客朔馬當風嘶征車夜中發星河落人面冰雪棱
馬骨壁立上蒼蒼雞鳴關影白

太華青濛濛三峯開芙蓉聳身踏落雁危步攀蒼
龍高高白雲上倏忽生虛空窅然天地始六合惟
清風自此九萬里不知其所終黃河走碧海攬結
衣帶中逝將洗頭畢濯足扶桑東

我行越陝州清曉望潼關終南散霜氣衣上峯影
寒解鞍息僕馬登城眺孱顏風雲起四塞渭洛交

我前東北橫大河中斷龍門山特險不能守爭雄
良可歎

信宿驪山下雨歇聞林鳩虛巖韻幽籟返照明高
秋韋公蘊真素想見逍遙游泉石餘綺麗衣冠邈
巢由勝事行已矣空山我何求

九嶷何嶢岼涇水注其麓山風吹野色霜草寒無
綠去鳥戀餘暉流雲動疏木當時祀睢上佳氣連
黃屋炎精颯已遙神物代相屬鬱鬱松柏林下有
狐兔宿立馬意蕭條秋山問樵牧

太乙下深黑雷霆駐虛空有龍宅其湫飛雨白日

中南游女媧谷北上銅人原荒岡翳叢楚古闕生
墟烟山河美如此人壽速若彼去去且爲歡沽酒
新豐市無使明月來照我持空杯

跨馬出咸陽緩轡行平疇清吟苑柳下迴眺陂塘
秋笑言展嘉讌漁弋陪良儔蒲苴引微繳詹何颺
輕鉤素心旣已諧畢景彌悠游商風忽驚暮颯然
吹古愁甘泉廢馳道玉樹凋崇邱往者能幾時我
懷殊未休

藍田好山水漢陂秀蘭杜蒼然紫閣雲暮入終南
雨漠漠藤裊村梢梢竹團圓荷蓀過前林歸漁聞

別浦藹此父老情爲我致清酤久客憶江南興盡
非吾土

青青原上麥鳥爲自相逐我行苦朝饑藹然飽春
綠望雲陟高邱采芳下西麓念我堂前圃白華有
餘馥媿彼循陔詩徒倚迴車轂

杜陵曲

金鞍玉勒杜陵客駐馬垂鞭望南陌楊花如雨不
溼人竹枝如烟澹暮春忽憶江南春暮好踏青湖
上多芳草如此風光獨異鄉杜陵花月使人傷

秋夜曲

華星耿耿月當戶美人池上歇歌舞芙蓉香老秋
風多風吹流螢亂如雨夢裏輕羅不覺寒醒來步
韞生離緒滿天清露送歸人隔院啼蜚續人語

紫驪馬

紫驪馬蹀躞萬里何雄哉不追赤日到西極安知
河水從天來崑崙落空小於指星宿滿地紛如埃
紫驪馬去復回生還醉倒酒泉郡馬頭春色桃花
開不見前年大雪十丈高連天人馬凍殺青海邊
青門觀侯生舞雙劍贈益都沈八丈歌

侯生袖中有秋水飛出芙蓉亂青紫虛堂白日走

精靈夾電穿空血人皆須臾一擲幾千里碧海無
聲老蛟死座中蒼髯七十翁滿酌金罍爲生起自
言年少時頭角亦頗奇彈碁與擊劍游戲無不知
雲門山中有老屋穆陵關南春草綠千年猛虎射
殺之徒手向前拔箭鏃朝馳燕馬問盧龍夜脫胡
鉤舞鸚鵡美人如花客如玉往往哀絲聞豪竹分
金呼管鮑作賦邀鄒枚肝膽時因酒邊露笑口却
向杯中開聞道秦皇古碑在興酣獨上琅邪臺當
時搔首隘八極未肯埋沒隨蒿萊豈知如今意蕭
瑟入蜀游秦計轉拙青門瓜落秋風多白頭看劍

當悲歌途窮景短奈老何嗚呼途窮景短奈老何
招勇將軍寶刀歌

將軍偉然淮海豪身長九尺腰帶刀讀書萬卷不
得意要扶輦極搏鵬霄天生奇材必有用持戟殿
前色飛動名標宿衛蒞親軍出試戎韜歷蠻洞乃
者紅苗暗九谿苗氛毒漲谿東西夾岸旌旗天杳
杳萬山鼓角風淒淒將軍手提三尺鐵夜半橫行
入虎穴飛落空中霹靂聲白是刀光赤人血五寨
榛蕪路已通南山隅負尚潛蹤爾時總制張經略
馳檄將軍趨首功將軍突出間道口矢石在前追

在後裏瘡轉戰九死餘縋險梯空身不有捷書申
報大府來枷杻赤立啼塵埃力勸受降止盡殺豈
知骸骨半成灰橫坡老稚將不免苦賴將軍丐殘
喘好生惡殺天地心忍以民命同雞犬至今九谿
千萬家將軍功德流無涯試看當時寶刀在英靈
出匣生風沙不見于公駟馬呂虔佩早卜他年子
孫貴公侯將相非偶然義結仁深動天地此刀殺
人復活人蛟龍氣涵江海春寄語世間報恩子勿
棄螻蟻爭麒麟

吳大帝廟

殿角響琅璫松陰壓畫廊神鴉寒觸火石馬夜窺
霜山色金陵在江流玉殿荒飛揚懷古意烟月墮
茫茫

落雁峯

黃河洗秋色太華削青金飛雁不到處白雲吹滿
襟天清玉女下日出蓮花深我欲此爲宅蒼然萬
古心

三原夜發

馬背江南夢春星滿客衣可憐楊柳月空照故園
扉累歲依人活全家飽食稀老親應倚望無米亦

來歸

登華山

二華中天積翠開
巨靈高掌壓雲臺
無邊紫塞秋風起
一片黃河落照來
呼吸便應通帝座
登臨誰是謫仙才
蓬萊清淺崑崙小
人代茫茫去不回

琅邪臺

琅邪臺古穆陵秋
指點金銀十二樓
天地東來橫碣石
滄溟北去抱神州
秦皇功德誣三季
夏諺諸侯勸一游
往事浮雲向空盡
老懷飛舞不能休

江頭野步

未暝見斜月獨行聞遠鐘秋風先我至江上落芙蓉

白荷

已愛輕羅步韞新更憐珠露洗秋塵卷簾垂手明
如玉月滿西洲不見人

元大父招勇將軍於乾隆五年征苗有戰績家遺佩
刀澹川作歌後兩浙詩人繼有作者

招勇將軍寶刀歌

朱彭

秋河閃閃明星高當天拔鞘天爲搖鯨鯢可斷鐵
可截瞥見百鍊將軍刀將軍起家備宿衛八尺身

長氣精銳引滿時彎玉靶弓騰空獨縱金絲轡龍
鱗袋貯呂虔刀獨立昂藏一戎帥憶昔旌麾駐九
谿跳梁犵狁喧鼓鼙青布纏髻身裹皮短刀林立
利若犀懸厓絕壁紛擎躋綿亘山谷連東西狼烟
冲天鳥不集將軍提刀竟深入一片刀光電影飛
鹿駭獮奔盡驚逸五寨居然一日平報捷軍門抑
何疾南山大箐賊尚屯將軍問道披荆榛墮坑傷
足不暇捫直搗巢穴清餘氛生擒俘虜幾千輩苗
欲乞生向刀拜將軍殺叛不殺降那忍株連同拔
薤後車捆載獲芻糧勁卒搜羅陳器械笳鼓喧闐

奏凱還饒歌作罷真雄快餘苗歸洞荷生成謀建
生祠奠醪醺歌呼跳月醉蘆酒五十餘年慶太平
近傳騷動辰州旁出洞標掠還遠颺嗚呼安得再
生將軍鎮苗疆賣刀買牛輸官倉 聖世服疇歌
樂康

湯禮祥

將軍一身萬人敵腰橫寶刀鐵三尺飛空一片夜
霜寒壁壘旌旗盡無色昔年奉檄征紅苗九谿寨
前殺氣高負力恃險黯且驕深林密箐愁猿猿黃
雲慘慘黑風急將軍提刀出復入戰血淋漓戰袍

赤

捷軍門五寨

尚縱橫

接萬帳降人馬前泣將軍

受降不殺降

歸苗疆戰績戎韜邁前代

狔狔聞名說

今重人兼重刀不數區區呂

慶佩酒酣月落

蛟龍躍出腥風多若將此

刀鎮蠻府威靈所無兵戈君不見漢家將軍馬

伏波天南銅柱高峩峩

朱爲弼

靈臺偃伯清妖氛平苗之績推將軍將軍已往佩

刀在凌烟玉具同銘勳鷗鵲碎花露鏐鏐螭獸喪

膽逃紛紜何年金精司鼓鑄拔鞘迸落星辰紋苗
民當日肆刦掠九谿賊砦屯如蝨飛毛坪前檄馳
羽龍家溪畔鳴鼓鼙將軍提刀奮神勇電光閃處
開風雲短兵相接斬萬級呼聲震谷迴斜曛餘賊
橫坡息殘喘神鋒所值破竹分渠魁旣殲櫬槍落
万乎此日無乃勤將軍凱旋報經略自洗血刃湖
之瀆雅歌投壺整以暇部勒諸將屯輓轡腰間三
尺一不用纏以鹿皮裹元纁降苗如蟻來紛紛男
者一縵女足鞞經略大礮聲礮礮將軍入辨色聞
聞奈何崐岡玉石焚遂開軍門受降虜白虎秋氣

化作春氤氲至今祠廟峙銅柱

辰州苗疆有銅柱乃馬楚時所立見

吳任臣十國春秋

苗民奔走薦苾芬秋堂傳觀奇寶出蛟

龍白日氣員員忠仁之心脫光守匣中夜吼聲不聞從來名將不黷武必有哲嗣光斯文將軍文孫今昌黎泰山北斗士望殷寶此赤刀作大訓文章黼黻佐聖君行看奕世偉鐘鼎呂虔三公何足云

陳文杰

風棱滿堂秋氣來寶刀出匣驚龍雷星辰搖搖海水立白虹一劃青天開將軍昔日初通籍入直明

光親執戟腰間三尺青芙蓉英風顧盼生顏色
詔書命典荆江兵獐花狔鳥迎雙旌戰氛欲起白
日暗寶刀夜作蛟龍鳴苗人鑄刀尺有咫鵝膏如
雪洗龍子一夜狼烟九谿起短刀林立三百里萬
夫斫陣聲震天將軍突出爲衆先霹靂在手陰風
旋髑髏墮地輕於烟九谿寇黨南山連負嵎虎踞
崇山巔縋險轉戰驚飛仙苗降爭拜刀光前令嚴
殺賊不殺民以殺止殺全窮鱗寶刀拭淨不復用
戰場花草生青春畏威戴德苗心死從此苗人不
反矣甲兵洗盡事春農匣中刀臥八河水淮南學

士將軍孫秋濤三折開龍門家傳文武世忠孝手
編家乘書前勳秋夜沈沈月如練滿堂賓客開文
讌寶刀捧出四筵驚一片寒光射人面想當盪決
陣雲開萬馬聲中激飛電百戰歸來血洗稜健兒
十萬傳觀徧古來戰績紀紛紛殺戮成功從未聞
君不見秦國銳頭白豎子漢家猿臂李將軍

歛鮑以文

廷博

居湖州之烏鎮長往來武林博極羣

書家藏萬卷雖極隱僻罕見著錄者問之無不知其
原委嘗刻知不足齋叢書及四庫書提要有夕陽
詩盛傳於時人呼爲鮑夕陽余贈以詩云清名卽是

長生訣當世應無未見書何處見君常覓句小闌干
外夕陽疎

仁和朱朗齋

文藻

能詩畱心文獻好金石老而貧居

艮山門外清溪前丁巳戊午間助余編錄兩浙詩數
千家雨久穿屋流余贈詩云雨後清溪繞屋流藤牀
著膝看魚游先生竟似陶貞白萬卷圖書不下樓

錢塘何夢華

元錫

博雅嗜古精審金石久居曲阜乾

隆乙卯與余同至杭州僑居西湖余嘗贈以詩云却
因風木常多病不爲清狂始詠詩一種閒情誰解得
夕陽林外讀碑時夢華昔在曲阜嘗步行孔林外得

漢孔君碑黃小松司馬易爲寫林外得碑圖

仁和趙晉齋魏博學精於隸古尤嗜金石文字歐趙

著錄不是過也予試杭州得其書牆暗記移花日一
詩決爲名士拆卷果晉齋也

錢塘陳春渠振鷺年七十清癯似鶴楷隸竝得古法

恬然閉戶以詩自娛蘇公詩云神清骨冷無由俗斯
人頗似逋翁也鄉人重之舉孝廉方正

錢塘何春渚淇詩翰條然遠俗清介自守老於布衣

余以孝廉方正徵之春渚以詩却云章服榮身孰肯
辭性耽疎放未能移閒臨遠水荷衣稱深入雲嵐竹

笠宜薦士孔融真可感恩親毛義不勝悲此情尚冀
垂憐察況是才非十駕時予荅詩云清聲無奈左雄
知老戀林泉未肯離若論不求聞達好此人曾賦却
徵詩

錢塘朱青湖

彭

老詩人也著有抱山堂詩集杭之學

詩者皆宗之家故貧甫能雕板旋燬於火青湖累被
火至是凡三矣遷居後仍近吳山乞余書抱山堂扁
其舊扁爲丁龍泓所書余贈詩云白髮吟詩獨閉關
著書常被八人刪龍泓未見山人癖別起書堂又抱

山

朱子湖抱山堂詩

七夕詞

烏鵲過停金梭思之子望銀河銀河滉漾流晴雪
半規月上遙山缺天邊牛女遠相望不獨人間眷
離別吳姬妝成出畫樓水晶簾卷涼雲秋綵縷穿
成月半落花陰漠漠凝雙眸月影花陰相度處漸
覺熹微天欲曙天欲曙黃姑去淚汎瀾灑秋雨
寒夜對月聽李玉峯彈塞鴻曲

一天寒夜靜孤月明百衲古琴几上橫霜颺忽向七
絃起滿座都作飛鴻聲鴻雁銜蘆過塞下斷續飛

鳴自嘔啞黃沙白草遠連雲天作穹廬蓋四野聲
聲掩抑風摧毛風前相失求其曹如繩不斷戍樓
外一聲直上狼烟高乍隔狼烟看不見金軫旋揮
調忽變千仞誰將矰弋施將軍欲啟頭鵝譙振翮
高飛避罽羅殺虎城邊競傳箭瞥然孤影向關來
傷弓更覺鳴聲哀邊笳亦嗚咽邊馬皆徘徊龍沙
回首一南望明妃愁上單于臺愁對斜行乍明滅
交河日暮行人絕隴外漫漫去路長側耳遙聽尚
淒切此時流響不在絃月光滿地寒如雪玉峯子
舍爾琴爾琴漫作邊關音水仙一操移人意與爾

還從海上尋

疊浪崖歌

攝山之高百餘丈中有危崖屹相向纍纍碎石千萬重游屐來觀疑疊浪上有撐空如繖之高峯下有六朝不彫之古松此崖迴合入樵徑浪花都帶嵐烟濃蒼茫彷彿春江瀉長風欲把濤頭駕乘興堪爲汗漫遊石帆高挂從天下定有琴高控鯉魚山前招手遙相迓我疑五丁力獨神鑿石散作波粼粼又疑天吳移海水一夕忽變青嶙峋造物茫茫不可測諧談未許憑胸臆且自支筇厓畔過芒

鞦韆踏浪看山色

月夜訪孫楚酒樓遺址過城西聞笛作

一醉下高樓揚舲向石頭伊人渺難卽異代迴含
愁風月自千古江山又九秋城西誰振笛閒步亦
清游

登妙高臺

長江遠自岷峨來金鰲昂首高崔巍樓閣千尋白
浪湧山川四望青天開林烟匝岸見歸鳥雲氣盪
胸無點埃誰畱坡仙看落日浩然獨棹輕舟回
垂虹橋秋望

楓葉蘆花徧遠灘蕭蕭風露作新寒秋光三萬六
千頃獨向垂虹橋上看

山陰邵夢餘

無恙

詩學極深各體皆善標格稍遜吳

澹川而性靈才調過之真勁敵也佳句五言如陶然
亭云秋聲千樹盡雪意萬山來宿舊縣云霜樹寒生
野天河靜對門清涼山云泉聲松頂落花片竹陰飛
吼山云石隨雲過水樹對屋飛泉夜發秣陵云水門
沈夜月山影上秋河渡太湖云雲懶眠孤嶺湖平立
遠帆自吳門旋白下云古岸生春水長江擁夜雲棲
霞云山花眠麝暖池月照魚涼七言如燕臺云雲覆

黃沙吞朔塞河流白日下燕山北固山看雪云雲痕
四合沈諸島雪色中開見大江永濟寺云莎草綠盈
三月雨桃花紅入六朝山姑蘇云四時花月吳趨曲
兩國兵戎越絕書晚泊石城云荒壘齊梁猶上月大
江吳楚自分星禹陵云風雨鬼神趨古殿鶯花士女
拜春山戢山云婦女同仇兵氣合山川重秀霸圖開
九日登通州城樓云霜下邊聲來朔塞日斜河色上
城樓又云地夾關河三輔合天無風雨萬山開燕子
磯暮望云霜中草樹聲難靜月下江山影倍寒揚子
暮潮空自落秣陵秋色幾回看雨泊三塔灣有懷云

大江殘夜生新水微雨扁舟夢故人晚過揚州畱別
云烟際白帆浮甓社雪中紅樹認揚州渡江云丹徒
城郭烟中度白下江山雪後看栖霞放舟云青山入
夢曾知己明月同舟當故人蘇堤曉步云一湖靜臥
羣峯影小雨香生萬樹花秋夜云鶴影倦依涼月立
雁聲寒帶夜霜飛皆清新俊逸雅近自然夢餘原名
騷曾官江南越中商寶意後僅見此君

邵夢餘蕉雪齋詩

京江晚渡

遠海淡無色微風夜潮長陰霞江面生新月渡頭

上放舟出瓜步衝波時盪槩大江無靜流浪打石
城響

鳳凰山對月

離離雙梧樹泠泠流素輝朗月令人曠興言上翠
微崇厓緣古堞面面層巒圍中橫萬里江烟水空
霏霏東指棲霞嶺西望采石磯夜山如殘畫淺碧
痕依稀席地羣呼飲金波漾餘輝長嘯拍洪厓清
妙暢天機空谷蒼遙響籟息聲漸希醉臥仰明月
四空星滿衣俯視松頂雲却在舄下飛鼎鼎玉宇
澗竟御天風歸

發龍潭至白門作

捨舟踏亂山一路入空碧村墟方曉霽屋帶斷雲
濕虛谷多回風松響滿孤石暗水流廢畦初陽照
蒼壁空野見微綠中有早春色一峯稜稜明認是
棲霞雪十載江南游層巒多所歷行客與青山相
見如舊識林岫雖故蹊烟景自新得譬彼清泉流
涓涓無滯迹人行元化中奚用感今昔歲去不可
留百年皆過客且酌白門酒勞此髮未白今宵照
梅花已非昨夜月

題望雲思親圖

朔風無寧日老樹無寧枝枝繁根乃枯成茲憔悴
姿親年不滿百百年有窮期子知養親日已非親
壯時事親日苦短況乃長別離白雲東南來招搖
西北馳親舍隔萬里眠食何由知朝得父母書長
跪讀書詞得歸愼莫畱不歸愼莫思煢煢父母心
淚下如綆縻仰視南歸雲猶在天一涯

送章芝厓出塞

男兒旣不能脅肩濫吹王門竽又不能赤腳歸荷
南山鋤短衣揖客上馬去北游直踏醫無閭我聞
路出飛狐道北方健兒身手好箭血秋紅幕下塵

鬼燐夜碧原頭草古來戰壘長城多花開塞下歌
邊歌已報將軍營鐵嶺不須甲士枕琯戈陸海自
昔稱不毛十年生聚成腴膏如花女兒十五六晝
騎蒙駝夜炰羔送君曉度居庸口夕陽繫馬關前
柳一夜新霜筆策寒行人爛醉邊城酒城上黃雲
如水流松山白月挂城頭西風吹起遼東雁無限
關山望越州

道出白溝河書初白先生夾馬營詩後

平沙颯颯來陰風萬木脫盡飛蒿蓬白溝自昔界
遼宋百年戎馬曾交攻黃袍聖人眞英雄鼎定洛

邑開岐豐玉斧劃河棄勿有豁達大度誰能同五
季殺戮禍已亟拓疆忍復興兵戎兒孫孱弱成南
渡安可追咎祖若宗錢王入夢索舊土中有天意
非夢夢汴京破壞宮闕毀藝祖寧不悲塵蒙燕雲
十六州作賂事由石晉難爲功若云割界太示弱
亡宋況復非遼東我聞德至四裔守無德焉用爭
提封君不見秦滅六國吞寰中長城萬里防邊烽
楚人一炬咸陽空

游焦山飲梅花樹下贈楊明府

一山如斷雲四圍海氣白中有千蘂萬蘂梅江流

倒漾花光碧楊侯邀我酌梅花拂衣便坐花陰下
夕陽沈沈不到地交柯密蔭幹若鐵幽根半埋霹
靂厓寒枝高壓虬龍宅一度花開一歲春孤清不
門江南雪試問梅花爾誰植昔年曾否焦仙識碧
海風迴有異香空山雪滿無行跡我疑古梅花卽
是高士魄一客爲橫琴一客爲吹笛玉管朱絲調
未終綠英飛下流霞席我抱梅花醉欲眠一身都
化青天月

題唐陶山

仲冕

岱覽圖

赤日躍海危巒紅九土色破青濛濛活雲如虬踏

雙足嘯聲吹墮松風中碧天飛下雙白鶴化爲綠
髮青玉童爲言洪厓在絕頂方攜雲笈還崆峒名
山五千禹域內茲嶽如海稱朝宗獅蹲虎伏不可
數牛眠鵲起多幽宮山川圖經久廢蝕幾人筆力
開鴻濛廿年冥想結崇巘君夢所見將毋同豁然
頓悟振衣處卽此萬仞高穹窿三十六盤重復重
天門浩浩來天風一枝七尺披雲笈一兩不借踏
雪樛凌雲醉拂日觀峰袖間攜滿青芙蓉釋山自
號陶山子況近先隴悲楸松君母厓于陶山卽代
山支麓也遂著岱覽
三十卷自著書聊述倚廬志作圖尚感前游蹤惜
號陶山子

我五嶽未登一正思開拓層雲胸名山入手如可
從徑欲吹竹騎蒼龍乞君奇書秦樹東手披或有
仙人逢

望岱

陡擁層雲起蒼然見嶽形勢盤平野闊色聚萬峰
青草樹浮春氣煙霞降帝靈東封七十二時有翠
華經

出都

此去猶爲客何嘗是故鄉獨憐霜雪盛其奈道途
長雲氣屯空塞河聲響夕陽迴瞻關路晚煙樹極

蒼蒼

登長干塔

聳身窺萬仞一鳥上雲來
日月摩空得江山劃地
開松藏靈谷寺草歇雨花臺
滿目南朝迹憑誰話
劫灰

泊棲霞

不到棲霞麓蒼茫已八年
一帆涼月下重泊寺門
前高樹橫秋漢空山響
夜泉幽居聞最勝應探碧
峰巔

履海

一片東溟土狂濤盪四邊雲橫成列嶂潮白失青天
戍屋懸魚網沙田藝木棉太平寧廢武橫海盛樓船

登香鑪峯大雪折從西嶺而下

到此天如握雲低千萬重層陰生海角大雪下鑪
峰乍喜過危石偶然來遠鐘野僧歸荷篠多在半
山逢

送李雪帆之楚

萬木變秋聲西風滿帝城高樓一夜雨曉送故
人行杖策游燕願狂歌入楚情獨憐關北雁辛苦

共長征

逢婁鑑塘

北風吹雨雪深夜故人來酌酒聊相勸孤懷且暫
開煙霞同抱癖山水獨憐才遲爾西泠去輕舸訪
野梅

錢唐懷古

鐵騎長嘶薄建康議和議戰總淪亡鸛鵝春散將
軍壘蟋蟀秋開宰相堂海上孤兒沈趙氏夢中故
土索錢王須知天意成南渡艮嶽山先號鳳凰
天后廟

闕下銀濤萬里來
霞宮遠對紫溟開
月高旌旆排雲出
風定魚龍拜浪回
千炬神鐙飛遠艦
百花香樹擁層臺
明禪願獻安瀾頌
秋雨秋潮靜九垓
曉過故關

朝暉遠射嶺煙開
烏壘高盤漢將臺
山勢劃天分岸立
河聲驅石過關來
戍樓雲擁旌竿滿
戰地風迴畫角哀
今日時清仍設險
少年誰是弄繡才

渡滹沱河

燕臺畫角動邊歌
木末平原見大河
阜帽烏裘歸上黨
黃沙雪浪渡滹沱
荒村日淡收蘆荻
空磧風

寒飯駱駝獲鹿城頭西指去暮雲紅處亂峰多

次龍安驛

白雲深處見棲霞古戍樓明夕照斜馳道四圍開
碧嶂 宮門一路近桃花江山自古稱佳麗野老
逢人說翠華曾讀去年蠲賦詔

帝心深念野人家

重過金山題寺壁兼示龔春林

四年浮宦江南路往返揚州十六回昨歲春風二
三月醉吟一上妙高臺載邀良友扁舟去又見名
山古剎開好語遠公莫相笑過門原是昔人來

永濟寺題壁

人語近江樹犬吠出叢薄
夜聞柅杙聲知有孤舟
泊

客夢破孤磬漸聞啼曉鴉
一夜山風歇僧掃門前
花

萬松嶺

種松三萬株翠滿亂峯頂
夜半山月生一松一月
影

舟行

紅杏花開客放舟
春風日日泛春流
一帆明月投

淮浦兩岸青山出兗州

遠戍空濛接呂城微風料峭半帆行一江春雨絲
絲暮臥聽吳孃轉柁聲

出白門

杏花如雪柳絲輕渡口濛濛細雨生惆悵行人過
江去十三樓畔正清明

蕙

百畝風光轉漸和幽芳也入楚臣歌從來香草如
君子但得花開不厭多

錢塘宋茗香

大樽

官國子助教嘗裹糧爲天台之游

所爲詩飄然凌雲有謫仙之意其子咸熙通經學嘗

注夏小正

嘉慶元年 詔舉孝廉方正之士浙江舉者十二人

仁和邵右菴

志純

翁蓮叔

名濂

錢塘陳禮門

振鷺

海

寧陳仲魚

鱣

楊純一

秉初

嘉興莊韶九

鳳苞

李中玉

穀海鹽張芑堂

燕昌

鄞縣袁陶軒

鈞

慈谿鄭簡香

勳

定海李申三

翼占

義烏樓萃千

錫裘

辭不就

錢唐何春渚

淇

奚鐵生

岡

朱青湖

彭

鄞蔣樗菴

學鏞

山陰陳默齋騎尉

廣寧

以難蔭官有孝行敦氣節甚

具才略精審金石兼工詩翰所著有壽雪山房詩余

題之云古人原不厭靡官只恐新詩遇賞難誰似憐才李文靖馬前識得夏金壇余欲以孝廉方正薦之辭不就

海寧陳仲魚

鯉

於經史百家靡不綜覽嘗輯鄭司農

論語注諸書而考證之浙西諸生中經學最深者也

舉孝廉方正江南陳方伯

奉茲

嘗謂所舉孝廉方正

江蘇錢可廬

大昭

安徽胡稚君

虔

浙江陳仲魚三人

可概其餘余謂方伯之言誠能識拔宿儒然安徽當

以程易田

瑞田

爲第一而胡君亞之

海寧錢馥布衣也精於六書小學年四十矣余欲以

弟子員屈之不就試旋卒其友邵右菴

志純

拾其餘

論爲書一卷右菴余所舉孝廉方正士也古文有法
秦小峴觀察深於古文於右菴有深契焉

海鹽張芑堂

燕昌

舉孝廉方正入省有胥吏弄文阻

之欲其來解也芑堂拂袖去云吾若與猾胥接一言
有負辟薦矣予聞之卽徵來省特列薦章中芑堂本
王韓城師所舉優行生名望素符真士無虛聲也尤
嗜金石嘗自摹吉金貞石文字爲金石契又嘗登范
氏天一閣摹北宋石鼓文勒石于家余借其本合明
初拓本重撫十石嵌置杭州府學明倫堂兩壁竝贈

芭堂詩云銘鑄鼎彝款象犧每看一字百摩挲却因
好古生偏晚不見蘇頌韓獵碣多

陳雲伯擬曹堯賓小游仙詩有云曾向紅雲侍玉皇
羽衣長染御爐香海棠萬樹愁春雨夜夜通明間綠
章此意非堯賓所及堯賓身肥重岳陽守云余初得
堯賓詩以爲可驂鸞鶴今見之牛不能載錢塘梁眉
子祖恩云百首仙詩破曉寒羽衣來謁岳陽官千年
重見堯賓過不跨青牛跨彩鸞

游仙詩佳者甚多俞雲莊寶華云夢入仙宮賦曉寒

黃金爲屋玉爲欄衍波牋上唐人韻記得銜名署彩

鸞方蘭騷

懋嗣

云朱鳥牕深戶半扇月明間愛鶴梳

翎紫雲一曲彈神雪多少仙人花下聽龔素山

應云

猶憶當年舊謫居詩巢花護未攤書有人獨折芙蓉

立多少神仙總不如姜怡亭

寧

云司香內史劇娉婷

菖蒲衣垂九子鈴閨苑無風門不閉萬花堆裏誦黃庭

春草詩佳者陳雲伯云南朝煙雨重三節北里鶯花
第五家小院空堦迷蛺蝶荒陵春水問蝦蟆又云客
路有時愁細雨天涯何處不斜陽玉關消息知何似
綠徧前朝舊戰場陳曼生云梅花夢後春纔到燕子

歸時客未還陳瀛芝云屐痕淺淡連宵雨簾影淒迷
一片山許柯云青袍欲借階前地綠鬢愁生鏡裏顏
堦堦生春皆礙馬藤蘿望遠莫登山孫夢麟云綠楊
細雨清明路紅杏春風上巳山吳清漣云美人若贈
同瑤珮燕子如歸正落花

春草詩多清麗芊眠之作陳壽蘇

文湛

詩云雁塞龍

堆道路長客愁如海正茫茫煙濃古戍思盤馬落日
平原好牧羊萬里秦關春似繡千秋漢冢土猶香遙
知紅袖刀鐙夢歌到藤蘿已斷腸可謂淋漓悲壯矣
余以海塘賦試杭士陳文杰許柯胡敬陳傳經文

壯闊胡敬水仙花賦僅三百字孤絃冷韻一時傳誦
又有闌干賦亦佳

水仙花賦

胡敬

爾乃冰堅曲沼雪積閒庭凡卉彫景仙葩吐馨藉
玉盤之瑩潔貯金屋之娉婷芳心綻黃稠葉披綠
豔質纏金幽姿琢玉揚秣陵之素華展凌波之芳
躅含脈脈之深情隔盈盈之一曲顧影裴回將開
未開移春有檻避風無臺若妃逢洛浦曳輕裾而
乍來日暄煙藹撻酥洗黛珠璣綴裳瓊瑤結佩若
神來洞庭迷綽約而多態碧沙文石淺步無塵閉

門獨笑幽懷泥人恍如神女逢交甫于漢濱冷豔
涵虛澄波微瀟神光陸離芳棕恍恍又如湘靈鼓
雲和而來往羌窈窕兮纏綿濯寒波兮色鮮映玉
壺而莫辨照銀魄以增妍羅襪凌風鉢衣疊雪與
畹蘭兮比貞同庭梅兮表潔洵含芳兮足嘉亦餐
英兮可悅作歲寒于吾廬兮對形影之清絕

闌干賦

胡敬

玉階迢遞金鑲葳蕤微雨宵霽和風曉吹戶暗虛
掩簾長正垂望遠情怯憑虛境危何緣徙倚得暢
追隨則有十二闌干橫斜位次疎不遮風長還音

地亭畔橫陳池邊低置礙竹斜通妨梅巧避苔點
香浮露含光膩倚徧迴廊寒生半臂爾其碧玉珍
奇迴文形勢石氏新樣楊家奢製七寶裝成百花
繁綴掩映璇閨周遭瓊砌盡態極妍增華崇麗南
朝隋帝之樓西漢王根之第窈窕瓏玲際檐傍櫺
值物賦象任地班形接芙蓉之行障連翡翠之迴
屏春老則飛絮如雪人去則涼蟾滿庭至如門草
閒娃吹簫侍妾戲罷秋千慵移步屨院古苔新迴
回林接小立花陰低垂星靨同凭如玉之春纖微
露畱仙之裙褶若乃巡檐索笑負手吟詩茶煙漾

際雨花散時黃絹千首紅藤一枝繞百匝而未厭
愛四圍之竝施屈曲扶徧欹斜步遲況復層巖翠
滴飛閣丹明虹霓迴帶井榦崢嶸夾翠磴以直上
亘丹霄而乍橫盤空陡豎倒景孤生眩轉難定攀
躋屢驚與夫門鳴聲喧流螢光炯點綴紅橋迴環
金井藥苗煙叢石涵秋影莫不采錯熒煌雕搜完
整護金谷之穠華助玉津之芳景沈香亭北倚多
時無限春光心已領

闌干賦陳雲伯句云宛轉迴文玲瓏卍字花片分紅
苔痕引翠畫閣三重迴廊十二畫靜無人月來有影

芳草閒階梧桐古井鸚鵡籠低鴛鴦瓦冷愁看花落
笑指雲生煙波白舫神仙碧城簫韻一牕琴心三疊
荷葉擎珠桃根繫楫銅鑲屈戌玉篆罽毼移來花影
冑住柳絲小作勾畱此日間凭之處最堪惆悵昨宵
敲遍之時陳荔峯復亨句云桐陰徑轉花影牕移蝦
鬚簾押鹿眼色籬地勢橫斜天然位置雅稱名園亦
宜蕭寺院靜晝長廊迴路接吟聳詩肩步傳響屨虛
堂敞處涼夜深時蛩語欲碎漏聲轉遲曲連畫檻平
接雕楹樓空月上亭古蒼生皆有神韻復亨今改名
嵩慶

杭州諸生能以明人法律爲時文者湯畫人

錫藩爲

最根柢亦深

錢塘有王仁仁和有王立仁海寧有王有壬其詩文

工力亦相近也

嘉興李穀有孝行嘗割股以救親鄉人稱之余曰毀傷肢體非孝也然以親故爲之則凡可以愛其親者無不爲矣且吾知其若仕必能致身於君矣時舉孝廉方正予特徵之列薦章中

試嘉興時兼以繪事有老諸生周封者山水蒼秀於風簷中寫秋山聽瀑圖卽前一日試士詩題也此外

有錢善揚乃蕤石翁之孫花卉極有法陳球

沈瀚之山水虞光祖之花卉皆錄之

杭州試畫錢塘朱壬山水花卉翎毛皆有法王卽青
湖子也徐鉞之山水梁學姚榕之梅花張國裕陳國
觀之花卉皆錄之

嘉興有三李超孫富孫遇孫皆秋錦先生良年後人

克繼家學

嘉興吳侃叔東發老諸生也博古能文識古文奇字

刻之耳所言

嘉興有二吳吳澹川可謂登高能賦吳侃叔可謂

器能銘

嘉興張叔未

廷濟

詩文斐然畱心金石於海上得

晉甄一曰萬

卜敗曰蜀師曰太康二年曰永寧二

年曰元康二年其不全者曰吳氏曰儒墓曰萬因

八甄顏其齋予爲書八甄精舍額平湖朱椒堂

爲

賦五言長歌贈之

八甄精舍歌贈張叔未

朱爲弼

周家塲埴之工不可見最古惟數西京瓦鳳甄

精入地字帶土花紫
建初俱載洪氏編

官地近接蛟蜃窟潮落寶氣騰出沙邊此

金非銀非瓊玉
心眼下燭窮九淵赤脚入

水退四五尺手
網網得珊瑚鮮萬歲不敗

追冰斯古文同吉陽利善祈延年蜀師例六景

蜀夫合良丁合土功致名乃傳其餘太刀

康作地法寶昇天監相後先滄桑劫餘僅存一二

字缺月隱霧斷虹凌秋煙拊掌大笑攜歸嵌齋

常伴一枝樵李春秋前精舍前陽衡文兼精

一子要收爨下桐木柯亭栲
王翁仲識

釋

版鐘鼎皆精研君

蘭紙命我

文句

謂

就凡將篇并出脫本

我凡五紙一

十

字珠璣連丹甌銀甕已見地寶出方今

聖人稽古真同天夫君著作彝碑兼柳雅他時蘭臺

粉署神仙一語贈君君宜銘座右莫學八瓠學

士耽高眠

嘉興楊蟠父謙嘗注暴書亭詩父子竝深朱氏掌故

命之修竹垞小志蟠尤長於詞嘗試花久筆圖

擅場

題影

題花影吹笙圖

生綃瑩淨看幾番皺出煙色

吳柳外惺忪簾額

羅疎微黃淡月相映脩然坐到深宵好奈料峭春
寒猶凝對冰蟾半臂添來壓住滿身花影猶愛
玲瓏石畔玉笙細弄處清韻堪聽冷浸丹唇響轉
銀簧度出林梢花頂笛空吹簫譜把一一新
聲重訂算生來不足神仙怎得老松清與

余試嘉興詞人偶讀范石湖花影吹笙滿地淡月
詞意以花影吹笙圖爲題調疏影佳者凡五六闕旣
乃屬石門方蘭士薰錢唐西梅洛補二圖吳江郭
頻伽錢唐陳三伯皆有詞

定香亭筆談 卷二

疎影

題花 吹笙圖

郭麐

潑水正玲瓏澹月簾影垂地悵望銀河閒弄
參差竹猗知是誰思橫枝清瘦疎花活漸節滿薄
羅衫子只枝頭翠羽雙棲窺見那時情事難忘
黃昏院落畫闌十二曲曲曲同倚半攏春纖半度
脂香炙暖一行銀字年來白石風情減有自作新
詞誰記但每逢花月嬋娟便想畫中雙髻

陳文杰

苔階露溼正晚風料峭輕涼時節小院無人閒理
瑤笙香唇定然寒徹南朝玉塞關山遠訴別恨聲

聲嗚咽漸滿身花影玲 吹醒一天明月 猶憶

小樓清夜箇儂在月下鶯管徐歇倚遍闌干羅袖
微拉纖手映來如雪繡囊銀字都零落空夢斷餘
音清越料祇應花外銀蟾照見斷紅雙疊

暴書亭久廢爲桑田南北垞種桑皆滿亭址無片甃
而荷鋤犯此地者其人輒病豈文人真有靈魂耶余
就其址重建暴書亭石階石柱可久不廢

暴書亭扁爲嚴太史繩孫所書亭圯而扁未毀仍懸

亭中舊有楹帖爲吾鄉汪檢討楫書竹垞集杜句云
會須上番看成竹何處老翁來賦詩聯木久無余重

書刻于石柱間

暴書亭

阮元

久與垞南訂舊銘江湖蹤跡髮星星六旬歸築三
間屋萬仞

頭秋芋熟落帆亭

畔古槐

早死雙孫老誰暴遺書向此亭

檢討後人藏有竹垞圖海陵曹秋厓
岳所畫余屬周
采巖方蘭士摹之竝和檢討百字令詞和者三十餘
人載竹垞小志

百字令

和朱檢討自題
竹垞圖原韻

阮元

元生歸矣記江南春雨扁舟初泊自種垞南千箇

竹老讓嬾雲閒託繭線牽魚弓枝射鴨足伴填詞
樂畫圖長在肯教蹤跡零落 今日水淺荷荒巖
低桂蠹殘址難斟酌何處牆邊樓影小曾展秋牕
風懷儒老乾坤書懸日月莫漫悲亭壑重摹橫卷
遠山還染三角

王昶

南湖放櫂正春殘兩岸楊花漂泊一卷生綃重畫
取彷彿前賢棲託茆屋灣環蓮漪澹沲負此幽居
樂潞河羈旅潮生還看潮落料是投老歸來書
亭醞舫昔雨同絃酌記向竹西頻話舊悽絕蒼荒

井幙者碩凋零雲初衰謝重見開邱壑

丁丑戊寅間余與稼翁同寓邗溝又與伯承同官陝右語及南北垞燕

廢悵惘久之今稼翁早歸道山伯承亦下世而芸臺學使將修復之是可喜也 他時過訪叢筠應滿籬角

吳錫麒

二分竹外記江湖載酒歸來曾泊老盡簷管人不

見往蹟畫圖重託菱葉波長藕絲鄉闊讓與閒鷗

樂寥寥琴趣翠聲天半吹落誰復黃雀風中門

雞缸滿相對斜陽酌秋水藉袈橋口路遮護幾層

雲幙危石能扶虛亭更葺高致傳巖壑明年筍候

一尖還迸紅角

錢楷

五湖三畝歎斯人仙去落荒蓬泊一片研經心事

在研經室學使齋名賸向畫圖尋託流水門前綠楊牆外

買斷垞中樂竹猶無恙幾番青復吹落擬向梅

里停橈小樓添處整頓還商酌學使有重修暴書亭意且覓

丹青傳粉本依樣圖書簾幙舊句重翻新詞競唱

別又成邱壑攜歸日下填詞聲價爭角

張若采

長蘆秋老有乘槎仙使荒灣初泊棖觸研經心一
片多少古懷難託看竹敲筇披圖岸幘更印林泉

樂簪綃櫺取翠雲千片飛落 還憶歷下移碑鄭
鄉表墓到處羞清酌試展畫圖仙館似學使有琅嬛仙館圖
清影斜飛簾幙亭廢重修書殘更暴對畫成林壑
圍牆栽竹游人遙識亭角

朱文藻

柳邊竹外後百年星使畫船重泊亭北垞南遺址

在韻事丹青堪託萬卷藏書雙周甲子藝苑談資

樂

舊圖作于康熙甲寅今圖作于嘉慶丙辰相距百二十三年矣

煙雲新染免教

名蹟流落 憶昔景仰宗風手編年譜系述勞斟

酌

文藻曾編竹垞年譜一卷

繡水橫塘曾盪槳何處春風柔幙

襍詩窮鬢鬢改歲序蛇奔壑江鄉歸老敝廬
同此牆角

修暴書亭落成重題一闕

阮元

南垞荒矣問書船潞水何人停泊經卷詩篇零落
後魂夢向誰棲託把酒能招披圖相慰畢竟歸來
樂結成亭子我今重爲沿落才見五馬行春雙
鳧漾水攜畫同斟酌尚有孫枝桐葉在護爾秋風
簾幙疊石栽花引牆圍竹依舊分林壑者番題柱
夕陽休礪牛角

余以養蠶詞試杭州詩士得絕句四十餘首錢塘江

鑑云美人莫惱秋羅薄一箔紅蠶兩鬢絲仁和諸嘉
樂云蠶孃若肯拚荒歲金屋新妝頓減來著意相反
便覺新警他若陳甫之記得前溪寫簾箔鳩聲梯影
畫江南沈毓蓀之流水滌洞桑不斷東風吹出剪刀
聲徐鉞之誰家少婦看花去猶恨羅裙繡未成陳復
亨之葉價怕昂絲怕賤蠶孃心事費評量皆能自出
機杼嘉興以鴛鴦湖詠鴛鴦命題亦得絕句數十首
張霖云阿儂生小湖邊住見慣雙飛雙宿時丁子復
反之云阿儂生小湖邊住不見鴛鴦相對飛但見鴛
鴦湖畔水雙流相合不相違曹言純詩云湖邊盡種

連枝樹好讓鴛鴦到處棲沈大成反之云知他水鳥
成雙宿開得芙蓉自竝頭楊蟠云曾記數來三十六
果然十八對成行吳曾貫云度却金鍼還倦繡有人
斜倚畫闌看亦佳

偶閱韓江雅集有陳授衣章養蠶句云蠶孃養蠶如

養兒用意甚佳金匱錢梅谿法有養蠶贈內絕句云

支持兒女眠初穩十萬生靈正待餐又云經綸吐盡

爲人用畱取輕身一對飛皆吐屬不凡余荅梅谿詩

云蠶利蠶工賴長官蠶多葉少養蠶難梅谿更有驚
人句十萬生靈正待餐梅谿工於八法尤精隸古與

山左桂未谷

觀

齊名欲以八分寫十三經復鴻都舊

觀

余試嘉興旣限鴛鴦湖詠鴛鴦復限射雕七律戲謂
幕中友人曰旣歌石帚暗香疎影不可不唱東坡大
江東去也嘉興吳書城詩云日落邊城耀錦袍將軍
射獵試鳥號雕盤峭嶺千尋出帛裂秋雲一箭高記
取平蕪灑淚血定知清塞失霜毛歸來解帶應酣飲
猶有腥風出繡裳可謂興酣落筆丁子復有句云自
有將軍能絕塞其看都尉獨過橋用北齊斛律光事
對李廣事亦典雅可誦

嘉興試銀河篇佳者頗多惟丁子復烏雲一抹起銀
浦灑作承平洗兵雨二句最洽余意余亦有擬古銀
河篇蔣山謂頗似唐人

銀河篇

阮元

七月銀河秋露涼八月銀河絡角長九月銀河終
夜轉曉天殘月已飛霜儂家生小長安住漢家轉
戰輪臺戍儂在黃姑渡口行郎向銀河最西處銀
河夜夜入高樓樓上風清易覺秋更有高樓在城
北樓中想亦有人愁鳳城砧杵停中夜珊珊疑聽
河聲瀉河聲若肯向東流乘槎會見征人下可惜

華年若逝波年年清露入秋多
宮中百丈銅仙老爲問紅顏更若何
紅顏半在鴛鴦殿多少秋風落
紈扇不見昭陽日影紅惟有銀河
鎮相見安能三五月常盈掩住銀
河不得明又恐流光千萬戶愁
人別有一般情

丁子復

秋河伴月案戶牖蒼龍掉尾連箕斗
白雲飛盡夜未曉金波無聲瀉空杳
仙槎徑渡水清淺癡牛服箱車輪轉
白練橫斜冷不收宵寒織室機聲秋
靈誰飛來兩翼鉤星耿耿秋繩直
欂櫨埽落摧寒

芒西流向曙迴清光烏雲一抹起銀浦灑作承平
洗兵雨

金衍宗

秋羅雲薄涼蟾入金井梧桐珠露溼銀河案戶聲
西流夜深烏離南飛急練痕遙挂暮天長新月如
鉤欲讓光十二樓中簾盡捲不知隔斷是紅牆盈
盈一水橫銀浦城上烏啼聞戍鼓刁鐃望斷玉關
秋砧杵敲殘雲渡古此時別殿晚風天紈扇西風
又一年秋屏銀燭涼初透玉枕薰籠悄未眠況復
高樓愁永夜天街一片金波瀉羅帶風飄下玉階

流蘇月冷臨芳榭別殿高樓共幾時仙槎何事獨
歸遲人間悵望銀灣畔碧海青天那得知

金光烈

井梧葉落秋風起碧天夜靜涼如水箕南斗北火
西流耿耿銀河千萬里仰視流光照女牛羽車雲
輦幾經秋素影遙連鵲觀清輝先入鳳凰樓鳳
樓鵲觀夜還曙一水盈盈不可渡縹緲如聞玉宇
笙高寒下滴金盤露誰家機杼動離情天漢無聲
似有聲蟋蟀階前霜乍冷芙蓉塘外月還明關山
萬里同今夕惆悵河梁終歲隔天上虛傳織錦梭

人間那得支機石奉使尋源憶漢家客星遠訪徧
天涯若從井絡西邊去試泛張騫八月槎

桐鄉金以報有詩才幼孤賴其長嫂節婦王氏教育
成之余書其貞壽圖後云昔宋興宗幼立風概謹事
寡嫂南齊韓靈敏事節嫂如母竝重于史官以報其
益敦品力學以副之

余在吳興試蘋花詩佳句如歸安孫五封云五字風
流在江南日暮春武康徐熊飛云小朵最宜涼雨後
清芬無奈晚風時孝豐施應心云幾點輕鷗閒似爾
一秋涼水淡於前歸安芮寅云細雨清香通款乃晚

煙深影聚蜻蜓鳥程馮潮云八月疎香依水木一年
好景記汀洲安吉郎遂鋒云八月涼波何澹沱六朝
清韻重徘徊江南花事日應晚湘水故人應未來

余於丙辰秋按試吳興中秋日試詩士以詠東坡丙
辰中秋作水調歌頭事命題烏程張秋水鑑詩云離

合悲歡十二時一番圓缺一番思前身本是來天上
除却君王總不知可謂得詩人敦厚之旨矣

張鑑菱花詩云漁婦曉來皆對鏡隣舟歸去便成歌
用典雅切

德清許積卿宗彥績學甚深於天文尤能會中西之

通徐養原乃西瀟編修

天柱

之子天算之功頗精自

言學之二十年矣

歸安楊鳳苞予初見其西湖秋柳詩以爲才士也繼至吳興鳳苞以經解入試于先儒之說剖析原委甚爲精核尤深于音韻之學謝蘊山方伯聘之入幕以侍老母疾辭不就

孝豐施小憇

應心

年未及冠詩學漢魏六朝以近體

作饒歌橫吹諸題舊錦新裁甚爲奪目

施小憇今樂府

上之回

萬乘向回中蕭關野燒紅樓臺望行月笳鼓警邊
風西極來天馬前軍拂彗虹甘泉故宮在落葉滿
秋空

將進酒

終日勸君醉良工未可觀江河杯酌盡天地酒人
寬對月金尊滿圍風繡幕寒放歌心所作得意且
爲歡

石畱

流黃搗錦石石上水曾經南浦春波綠西洲蓮子
青寒沙明遠渚涼雨散繁星載酒何人過蘭橈不

暫停

隴頭

隴頭流水去天涯
隴上征人苦憶家
寒雁自憐蘇屬國
驕驄不戀李輕車
秦川萬里開冰彩
嶺樹千年著雪花
嗚咽數聲驚別夢
朔風何處動清笳
洛陽道

長秋寒夜幾聞鐘
大道春光是處濃
遙憶層城見楊柳
相看雙闕似芙蓉
龍銜寶帳三千所
鳳卸珠簾十二重
蕩子更工蘇合彈
五花驄馬好游從

紫驪馬

黃雲海樹隱邊笳滿路烽煙滿磧沙老去秋風移
苜蓿羞看夜月映桃花獨棲聊謝紅梁燕共飲難
將白鼻騮錦作連錢珠作絡馳歸應是日初斜

孝豐吳蘅臯

應奎

余兩試其文均置高等不知其能

詩試畢自呈其讀書樓初稿苦吟綺思絕似長吉樂
府歌行尤佳始知錦囊佳句不受風簷迫促也設
吳生自呈其稿則吾失此人矣然則吾所未見之才
亦多矣爲之憮然

吳蘅臯讀書樓詩

古豔曲

秋來明月照高樓少婦當窗黯欲愁
驄馬長年驅遠道芙蓉別浦隔空洲
重重芳樹浮雲合穆穆金波亂水流
書札不堪頻目斷天邊莫問大刀頭
熟知絲布澀難逢莫唱吳聲最懊儂
不分房空棲病鵠誰憐骨出比飛龍
長檣鐵鹿三千里大道朱樓十二重
浪語移湖安屋裏繞牀那得種芙蓉
十重樓閣九重牆本是盧家舊畫堂
院院東風紅芍藥池池春水紫鴛鴦
柔柔婀娜嬰蘭婦憎馬瑯琊大道王
相望含情不相見祇憑飛夢越河梁
油壁青驄記舊遊團團初日正當樓
齋房芝草皆

連理露井桃華總竝頭巫峽巫山真是夢江南江
北別經秋文通才盡西洲曲錯道君愁我亦愁

思翁辛苦唱妃稀日暮增城怨落暉西北牽牛長

獨處東南孔雀任孤飛秋風嫋嫋欺團扇明月盈

盈鑒薄帷多事定情繁主簿愁悲也道結中衣

機聲啞軋隔窗聞每想鷄鳴到夕曛合匹不成三

葛斷流黃初染色絲勢寒更銀燭紆紅淚春晝梨

花入夢雲織得迴文無可寄空箱伴疊石榴裙

香印成灰玉化煙開經壬子正今年神山別有三

珠樹雲路休看七寶鞭洛浦巫峰原是夢清塵濁

水罷和憐笙歌何處繁華會乍著青裙尚惘然

康徐雪廬

熊飛

幼客平湖備受孤寒之苦勵志于

學詩有才力尤工駢體文嘗有啟投余云春風未至
先欣桃李之心時雨將來已動蘭蓀之色是能不失
唐人風範者

徐雪廬風鷗詩鈔

登支硎山曠然亭

遠山來自天目峰元氣盤結蒼精龍龍行一曲一
城郭地脈騰躍皆趨東觀音山頭萬丈壁上有磴
道凌煙空湖光山色抱三郡氣勢收納亭之中我

昔倒拖青玉筇登高手摩竹柏桐繁霜旣降山骨
露木葉掩映斜陽紅浮雲出山風轉蓬今日又到
王宮吳郎石子存舊約桃花落盡重相逢連山
一木吐萌甲春雨一洗爭蔥蘢紛紅駭綠森滿眼
洪濤鼓蕩千芙蓉飛流濯足興未窮飄飄更倚巖
前松扶輿靈秀莽奔放下方一片青濛濛人生何
事戀榮辱白髮容易摧春容掉頭竟泛五湖去豁
然天地翔孤鴻

登穹窿山

我昔手攜赤藤杖紅樹林中躡星上丹霞滿山風

裂破天雞不斷空中響二十年來孤往客芒屨又
踏山邊石入林恍惚失來徑四面崇巒插天碧山
雪瀑挂千仞溪上桃花深一尺花間磴道蒼蘚
斑玉清洞府非人間眼前突兀耀金碧靈真出沒
松風寒森然動魄翠微裏七十二峰生足底鬼神
驅使洞門雲遮斷微茫太湖水上山下山一片白
呼吸雲華生羽翼古臺嶢嶢臨不測我忽登之亦
奇絕空山萬古春茫茫放眼一氣同青蒼征帆過
雨去不息遠山多處吾家鄉田園半荒歸未得夢
寐長在天一方赤松仙人倘可遇此身願學張子

房

焦山尋瘞鶴銘

仙人御風行控鶴如控馬何年委靈骨遺跡荒山
下長江湛春容月共寒潮瀉幽竹碧濛濛廊陰雨
飄瓦殘碑叢古苔林樾映清灑瑤池失清唳露白
仙音寡天末三層樓吹笙懷隱者

與京口諸子重登蒜山春波閣

倉然淮楚到尊前勝侶重逢啟別筵高樹濤聲過
白晝大江帆影落青天驚心風雨登臨日回首英
雄跨月年十萬長刀礮寇地那堪海道尚烽煙

廬蓮花莊懷趙子昂詩云花時鶴徑仍芳草門
鷗波易夕陽施小憇歸雲菴懷孫太初詩云菴前
唱晚來起月下鶴聲秋裏聞俱饒神韻

思翁最喜趙吳興離華秋色圖所撫不止一本余
其癸卯年所臨畫幅帶水長林浮煙遠岫草廕松
韻雙清吳興山水以清遠移人然濟南據岱麓
七十二泉隨地湧出匯爲明湖水木明瑟萬荷
流出城北滌洞華不注前每當秋霖初晴橫雲
俱如圖畫中矣余兩年歷下復至吳興思翁此
而懸行館自題長句且命多士題之

吳興試院題董文敏摹趙松雪畫秋色圖

阮元

恩翁本是江南客老與吳興門風格一卷分從舊
墨林自染青山上生帛歷下青山有畫華山前元
正草窗家吳興清遠家何處碧浪秋蘋自作花道
入同住鷗波裏爲畫齊州好山水秋色山光尺幅
中
西風鄉思千餘里我曾兩載按齊州萬朵荷花
尺樓七十二泉流不盡青煙兩點畫華秋畫華
也眞
絕畫意詩情不能說螺黛濃開邢尹眉
則昆吾鐵白雲如帶樹千株雲外單椒翠

影孤若愁難到雙峯下試看華
此幅圖華亭妙
筆朝朝見壁上雙峯壓吳練我今攜畫到吳興空
見秋山大如弁弁山南畔小詞場秋
題詩千百
行好山到處看不足又上何山
山名望弁陽

蔣徵蔚

明湖秋水明如練我在江南不能見
離華山色鬱
蒼寒我向吳興畫裏看此圖本是鷗波筆點染生
綃誇第一癸辛街破草牕寒流傳更到香光室香
光妙筆擬鷗波平遠青山擁髻螺無端描出單椒
影想見豪端秋氣多雙峯秀澤橫雲衣暮靄朝嵐

青未了練帶頻將跼注躔天容畫出眉痕小有時
著意作深秋樹杪千尋紫翠浮雨點空蒼畱不得
山煙早已徧齊州三間屋近依山住本是齊州棲
隱處可憐泗水老潛夫苦憶當年山下路作圖聊
復慰思鄉一段風流未可量只今讀畫多生趣想
見丹青各擅場竭來我訪鷗波屋菡萏霜清殘竹
未離華深惜不親游欲乞弁陽成小築

徐熊飛

秋山卓立秋波清古香觸手煙霞生單椒秀澤忽
在眼林巒婉嬋明秋晴香光主人足天趣簪紱不

淡山林情幽花開老畫禪室染筆欲與鷗波并螺
峯兩角落縑素絮雲一抹橫輕清點綴生青塗活
碧嵐光澄淡波無聲昔聞公謹溯茗雪弁山深處
開柴荆王孫特爲寫鄉思離華青峭當軒檻雲煙
過眼入樵李幾時尺幅歸華亭華亭所摹非一本
今觀此本尤爲精華不注山岱麓北明湖倒浸青
蓮莖霜風淒緊木葉脫秋氣白若銀河傾吳興山
水但清遠安能瘦削由天成想當林臥契巖谷粉
黥墨黹勞經營古來妙手兩文敏每借山水通仙
靈試來展讀白蘋館齊煙千里飛空青

烏程陳無軒學博焯勤學修節能詩工書鄉黨以孝廉方正薦之以有官之人未能合例中止

道場山歸雲庵有孫太初墨蹟手卷并明人字畫極多陳無軒彙裝爲三卷余在湖州以官帖向山僧取觀畱帖爲券閱畢仍以卷易帖以防胥吏竊匿且爲後來長官取卷之例

題孫太初墨蹟卷後

阮元

山人化作秋雲飛吳山松冷雲初歸草菴白塔不能至惟見白雲明夕暉去年道場山上去杖策直叩枯禪扉聽詩頗有古錦版侑茶不用黃金徽今

秋移文入山去直取朵雲來棘園滿堂賓客共翦
燭把卷羣歎所見稀山人詩翰清似鶴華陽真逸
猶嫌肥後來過客五百載縑楮半爲山人揮蒼煙
過眼月露溼疑有雲氣沾人衣此卷不可染塵俗
送爾以詩歸翠微

以元人十臺懷古詩及序試湖州詩各有佳什序文
尤多沈博絕麗之作武康徐熊飛云瀟湘過雨雲夢
生煙章華之鸞珮璆然朝陽之蛾眉宛若彭城水落
項王有戲馬之鄉督亢霜高燕昭築求賢之館亭長
歸來已爲天子泉鳩諡後空怨食人歌風則雲氣連

天望思之草華荒地雲擁愁來波流恨去山圍故國
鶯啼三楚之花火入荒陵鴛化六朝之瓦烏程張鑑
云浮雲南北憐舊曲於銅鞮溝水東西惜商歌於玉
樹臯盤細馬徒呼劉表之鷹夜冷蛻膏不下武王之
鴨金仙已去聽漳水而無聲玉馬徒畱寫昭陵之遺
影臺邊鴛瓦虛覆寶衣帳上銅溝愁窺鵲鏡烏程周
聯奎云鹿游茂苑三層少碧玉之階蓮落梧宮滿地
有紅心之草笑當塗之鑄雀二喬已嫁英雄誦賦筆
之凌雲七子獨推貴介歎凌暑避如迎北牖之風鳳
去臺空漫鎖南朝之月銅仙已別淚灑秋香鐵馬頻

來露飄夜月歸安姚樟云重踏乾谿之雪來攀鶴市
之花花谿茂苑懷春之蘿苧猶香翠被玉鞭問鼎之
英雄安在殘山賸水偏歌金縷聲聲衰柳斜陽吹落
碧雲片片冀北山川遙通朔氣九州人物盡自東來
鄴下之霸圖已歇漳水東流金陵之王氣全收雲山
北向香分履賣憶春朝寒食之期燕冷烏棲正白下
西風之候歌殘金鳳路指銅臺聲怨紅鵲洲寒白鷺
桂宮星暗依稀愛子之來歸玉碾塵生彷彿麗人之
入夢三千年一萬里歌臺舞榭盡平沙落日之中前
三國後六朝蘭殿珠宮生春草秋風之感

姑蘇臺

徐養原

風冷梧宮怨若何
越來兵燹等閒過
捧心士女愁
麋鹿嘗膽英雄枕
甲戈香徑平煙迷
夕照寒村浣
石冷秋蘿生
憎枹鼓親援日
消得高臺幾度歌

章華臺

周聯奎

度材截竄氣憑陵
誰信三休到未能
驕志曾隨長
鬣相雄風偏愛細腰
登投龜肆詬真同戲
當璧爭
端曷可憑却笑乾谿
終走死渚宮荒冢
野花凝

黃金臺

溫純

歎息昭王尚有臺
英雄於此劇憐才
春歸黍谷思

鄒衍秋掃苔基問郭隗濟上論功昌國最薊門長
望霸圖開誰言天下無奇士不爲黃金不肯來

朝陽臺

胡澍蒼

巫山雲雨本荒唐一夢千秋枉斷腸
謫諫何曾原宋玉微辭從此感襄王
須知神女心無玷其奈文人筆太狂
暮暮朝朝空想像楚天極目但青蒼

歌風臺

姚樟

大風雲起古臺平莽莽河流泗水聲
帝業已歸三尺劍長陵不與一杯羹
祖龍歲月先奔逝逐鹿山河幾戰爭
知道他時王諸呂九原猛士泣韓彭

戲馬臺

邵保初

虞歌騅逝總消沈百尺高臺自古今
竟有浮雲齊沛水苦無王氣壓淮陰
彭城九日空秋草垓下千年有壯心
輸與尚書臺上客百條祖饌發高吟

望思臺

唐晉錫

嫡孽稱戈且莫論繡衣持節最驚魂
求仙下策成巫蠱開塞荒兵到子孫
突出銅人原可怪遽殞金玦豈無冤
傷心不待壺關請未上高臺已淚痕

銅爵臺

鈕芳春

清漳流水繞荒墳猶見三臺倚夕曛
文獻鄴中傳

七子英雄天下竟三分名香綺履埋荒草古瓦殘
觚落暮雲太息當塗貽祚短墓門誰表漢將軍

鳳凰臺

孫姚桂

振衣直上鳳皇臺鳳去千年竟不迴三國遺風空
寂寞六朝舊事重徘徊依依飛鳥望中沒葉葉征
帆天際來莫負崔家黃鶴句較量終遜謫仙才

凌歊臺

施應心

宋主凌歊遠擅名當年于此會羣英揮戈遂使羣
姦戢伐荻從知霸業成百里湘潭搖翠堞三千歌
舞住雕甍可憐丁卯橋邊客雪水雲煙動古情

歸安嚴元照沈潛經史小學淡於時名余於錄遺識之所著娛親小言頗精覈

吳興風土宜蠶桑田之多與稻相半丁巳八月下旬按部至此西風落葉騷騷然有深秋意矣因成四律以邀和者且以課郡中詩士時江浙和者數十家惟錢唐陳雲伯獨有扶桑倚東海一枝仙槎四時紅二句意境闊大得未曾有

秋桑

阮元

扁舟衣袖乍驚寒下若桑林綠意殘初響天風知半落未逢夜雪已先乾樓前有日蒼涼出陌上無

箏錯雜彈若使秋胡今始到黃金一色樹頭看
西河古社重徘徊木葉應知庾子才淇水秋期貧
婦怨晉廷九月餓人來采菱織手空戍妒舞杯輕
腰不共迴偏是吳儂感蕉萃十年牆下記親栽
疎陰十畝間青黃誰向花前喚索郎釀秫時光宜
薄醉調絃情緒動清商但教天下輕絲暖何惜林
間墜葉涼試種東坡三百尺芟來終比暮春長
漁陽八月已空枝還是吳興霜露遲飛鳥雨晴猶
護羽野蠶風定尚懸絲遠揚試伐深秋後光景能
收落照時料有茗溪老桑苧垂虹秋色滿新詩

伊湯安

秋老桑畦落葉填野人籬落興悠然鷄鳴隔巷增
涼意鴉亂疎林淡夕煙陌上風高懷靜女隆中樹
古想名賢祝他比戶皆輕暖繪入豳詩第幾篇
花間戴勝記新陰啼鴂聲中思不禁剩有風枝掃
茅屋尚畱霜葉襯楓林明年春繭須如甕薄暮秋
胡莫贈金好待樹頭紅甚熟勸農時節重相尋

秋桑用王阮亭秋柳詩韻

蔣徵蔚

阿儼何處黯秋魂放棹重來過石門五畝小牆凋
沃影一林寒露認柔痕當時筐執吳孃手此日杯

傾簪下村擬種原蠶知未得金鉤輕翦更休論
猗猗本是不經霜枯盡天風到野塘看處莫教連
柘館折來猶記覆蠶箱塵乾東海愁仙客寒重西
虞記穆王更乞成都栽八百醜條從此老閒坊
愁絕秋人正授衣紅閨禁忌事全非綠梯踏罷路
猶在黃日照將枝漸稀少女年華憐欲老寒禽牖
戶不禁飛幸他未化機絲去憔悴深知節序違
如黃滿箔劇堪憐疎榦而今只聚煙無奈林中難
戀宿有人樓上欲裝綿交交黃鳥空三月采采青
裙又一年爲語羅敷休悵望來春證取綠雲邊

江振鷗

收盡原蠶樹半空疎枝搖曳暮秋中休將怨綠題
餘夢却爲知寒耐晚風篷戶樞機吟索莫玉人爪
甲賸玲瓏輸他綺繡先春去賺得丹黃對錦楓
零葉猶堪飽夜霜西風又送馬頭孃略畱閒畝春
陰在空使歌臺舞袖長牙尺才分人冷暖筠筐休
說價低昂羅敷本是貧家女誰壓江南黃竹箱
蕭條白日上牆陰墜葉陳根春事沈半載雨晴誰
料理一園霜露最侵尋唐梯仄徑無人到柘館寒
川落影深祇有野蠶僵不得又成寒蝶入荒林

千樹平圍碧浪湖客懷銷落一株株使君五馬來
何晚寒上單衣望未孤漫使銀尊翻鑿落先看筠
管響蒲盧閒吟且勿傷遲暮老繭抽絲紡得無

陸繼輅

獨客禁寒待寄衣吳興秋色太離披一林風冷初
傾釀幾葉春殘未化絲秦女攜筐歸緩緩陳王讀
曲記枝枝我來偏動流年感小字空傳未嫁時
秋閨閒挂桂枝鉤日出東南不下樓敗葉有時棲
蛺蝶空林無復聽鳴鳩織成虛訂黃姑約落盡非
關青女收何必陌頭衰柳色短牆一步動離憂

鬢影衣香似隔生漁陽歌歇事頻更乍拋春女悲
秋淚訝聽涼宵食葉聲似爾飄零真不負幾人刀
尺未催成爲他八百孤寒望早發春芽慰別情
天風枯盡正愁予且喜猶傳汜勝書寒甚轉依斜
照裏感深尤在嫩涼初相君老去思荒宅處士秋
來戀敝廬衣被功成休更問閒閒十畝未全墟

端木國瑚

桑莎西風郭外稠枝頭誰復挂金鈎雞豚影散村
陰寂矜稻風寒社事秋無藉煙花連杜曲任教菱
葉采汀洲征人未返羅敷老五馬重來爲爾愁

會記桑陰綠過牆
半年閒煞馬頭娘
晞風蕤剩并
刀影覆露枝空
野繭香春好也
曾彈陌上夜寒
猶自夢漁陽
最憐賣盡新絲
後却共天寒翠
袖涼更補幽風
盡裏看分明村
景見闌珊柴門
客話夕陽落柘
館人稀秋雨殘
月冷機聲縑露
寂鳥空梯影踏
煙寒世間若有
冰蠶種綠老霜
前尚未乾萬家
衣被一春償自
耐閒閒十畝涼
繭種蝶魂迷古
陌絲團蟲影挂
斜陽鶯花邵宅
誰供圃雞黍田
家獨面場晚乞
使君桃李課也
將餘蔭問江鄉

童槐

天風昨夜到枝頭無復當時繞指柔帝女緣空辭
晚歲秦娥夢杳隔深秋黃綿人散村前社紅葉聲
多陌上樓我亦清寒依十畝絲絲不斷憶春愁
矮林疎秃乍經霜動影餘暉戀女牆旅語新尊話
重九邯鄲舊曲怨清商幽禽心事營巢戶處士秋
情仰屋梁畱得雙蛾憐已老前身依約認空桑
已教羅綺徧南州獨忍荒涼奈爾愁遠道夢殘驚
促織故園秋老賦鴟鴞煙埋亂葉提籠徑影斷斜
梯削桂鉤豈有紅顏來采采惟聞菱唱隔蘋洲
記得深閨蠶事忙馬前濃綠見攜筐重經上箬霜

初白錯認東坡樹本黃千戶侯門殊冷煖一時仙
侶說滄桑秋風病骨南陽思舊日琴絲亦漸荒

徐熊飛

雁信先催下若寒叢條徧野雨初殘田家客到酒
方熟樹杪雞鳴露未乾柘屐任教乘興去銀箏還
記盡情彈近來不厭多黃落雜樹柴扉畫裏看

征途何處動低徊木落漁陽想漢才木末已無蠶
妾隱林間誰訪索郎來白蘩帶露村村曉黃蝶從
風故故迴滿耳蕭騷鳴碎葉陽春曾向陌頭栽
蕭晨極目葉垂黃林外郊居是沈郎綺日光寒剛

八闌天風聲歇已三商
枌榆古道秋煙晚槐柳荒
村霽色涼三宿匆匆感栽植寸心還與水流長
斷垣高下映煙枝無那江南雁信遲落日叢條淒
碧野濃春桂籠繁青絲西風古驛蟬嘶後涼露東
臯雉狎時澣筆爲圖憶松雪盡收黃落入關詩

張鑑

翻翻落葉下柔枝舊部爭傳樂府詞才見使君來
遠道不堪女伴阻前期黃雲戍上西風緊紅粉樓
頭暮雨遲嬾向曲腰問消息湖池遙望已離披
蘆簾紙箔滿比鄰三月深閨少婦情玉勒再來成

舊夢金環重探認前身垂垂寒蜨迷空社格格鳴
鳩過別津比似吳門仙蹟斷滄田東海又揚塵
閒却金籠更玉鈎山蟬嘯罷忽當秋竹根夜冷傾
紅友城窟霜乾踏紫驪虛憶美人空北部幾時高
士話南州祇應寡女絲猶在彈作清商上陌頭
神仙丹甚本虛無凋盡成都八百株斜日鰲蛸懸
老樹晚寒鑿落倒新鱸于今拈葉悲秋士向後攀
條屬小姑禿樹只應同白髮誰栽黃竹到句吳

陳鴻壽

下若驚迴浙瀝風綠雲吹起碧湖中攀條別意遲

青女療眼奇方覓宛童桑落酒傾陶令宅柘枝舞
散楚王宮野人不解愁搖落祇喜斜陽到檻紅
彎彎涼月唱初三折與兒童當篠簪刀尺聲中人
似舊牛羊牧去路偏諳寒雞向暖飛枝北野更尋
秋過屋南虛說星精能駐歲不如託命是紅蠶
柴門仍借遠山遮烏柏丹楓豔歲華著作林疎望
歸雁文章樹老待棲鴉寒濤碧海仙人地野火殘
煙帝女家莫怪機絲虛夜月一時散繭尚騰花
驚心女伴促裝綿話到漁陽思悄然秋陌春閨渾
似夢三榆五棗互生煙年豐早賽雞豚社風緊初

開鵲鶚天羅綺叢堆誰省識憑渠衣被總年年

陳文杰

寒林葉葉響天風秋在疎煙細雨中牆外空條仍
嫋嫋陌頭圓影尚童童三更冷露迷梁苑二月春
風憶鄴宮獨有樽桑倚東海一枝仙槎四時紅

指點疎林蔭綠潭夕陽惆悵使君驂書編淮海春
非昔圖展幽風景尚諳憶我曾經歌陌上有人對
此話江南莫教蟲食清陰減畱飼吳儂八月蠶
春郊曾憶綠雲遮蕭瑟江鄉換歲華五畝新涼飛
野雉四衢殘照隱歸鴉箏彈秋月羅敷宅琴譜西

風漢相家檢點寒袍感衣被論功壓盡洛陽花
家家妝閣熨吳絛話到三春事惘然繞宅清陰流
曉露連村疎樹瘦寒煙西河舊夢紅蠶月南陌新
愁白雁天寄語吳孃莫惆悵鳩聲梯影待來年

陳文湛

指點寒林傍野塘西風蕭瑟冷啼蜚隔牆嫋嫋陰
猶綠繞屋疎疎葉漸黃女伴春游懷陌上美人秋
夢到漁陽丁寧纖手休輕折玉露宵來分外涼
一片疎黃隱遠吟柔柔無復媚三春連宵涼露鳴
鳩斷十畝清陰野雉馴紅雨筠籃迷舊跡綠雲刀

剪憶前因復君五馬躊躇過目斷當時採葉人

胡敬

微黃比似鞠衣痕幾樹蕭疎蔭華門材美早需當
世用價高畱待異時論禦寒祇爲蒼生計歷久空
餘直幹存多少綺羅叢裏客可曾根本與酬恩
西郊昨夜有霜侵減却茆檐一片陰但使陽和調
晚節幾曾經緯負初心春閨自昔相須急寒士于
今得庇深菊秀蘭芳休把玩直垂青眼到疎林

龔 雁

兩度攀條意最長憐他東海舊栽桑百年偏易逢

秋夕一樹曾經捧太陽重遇使君紅叱撥已拋天
女綠衣裳吳孃嫁後工相憶憶到青青也斷腸
轉眼離披照影微橫梯落翦事都非盤中絲盡春
蠶老陌上車回涼葉飛兒女生涯渾似夢田園風
景不如歸城西柘館依稀認冷雨寒風又打扉

江 鏐

普利真成色相空息心名義誤從同天興寺裏蕭
疎雨願會堂前浙瀝風僧錫未妨三宿戀佛華虛
借一枝紅衲衣若復求絲縷忍向春時憶折蓼

錢唐方芷齋夫人

芳佩

汪芍陂中丞

新

之室也幼工

吟詠曾問字於杭堇浦翁霽堂兩先生著在璞堂詩
集於閨秀中卓然稱大家亦有秋桑和章時楚北用
兵中丞督師籌餉戮力王事夫人歸里省墓故第二
章結句云然

秋桑和作

方芳佩

閑閑十畝淡煙遮寒日疎林噪晚鴉葉落漁陽愁
筆策枝空鄴院冷琵琶陌頭重訪人如夢茗水初
波客憶家祇有珠江風景好依然紅徧佛桑花
雜樹丹黃隱四衢仙山寒重說西虞樓頭雪箔人
今昔海上冰絲事有無偶檢蠶書懷帝女因吟樂

府詔羅敷烽煙未靖征車老閒却成都八百株
閒同女伴話前游無復唐梯與桂鉤葢影尚畱天
子氣箏聲如訴美人愁涼波瑟瑟湖池曲疎樹依
依陌上樓惆悵垂虹橋畔路重來已是白蘋秋

酒香時節晚陰寒此際農家亦閉關黃蝶飛來梯
影寂紅蠶夢斷剪刀閒吟殘柘館西風裏畫向柴
門夕照間聞說使君詩第一大裘心事似香山

鄞縣蔣孝廉

學鏞

乃全謝山高足弟子老年閉戶於

學無所不窺甬上萬氏得藜洲之傳史學冠天下萬
氏沒謝山得其傳謝山沒學鏞得其傳縣令郭文鈺

以孝廉方正徵之辭曰余老且病安能遠至杭州折節於諸大吏之門耶卒不就余益以是高之兩至鄞不得一見

范氏天一閣自明至今數百年海內藏書之家惟此巋然獨存余兩登此閣閣不甚大地頗卑溼而書籍乾燥無蟲蝕是可異也閱其書目龐雜無次序因手訂體例遴范氏子弟能文者六七人分日登樓編成書目屬知鄞縣事張許給以筆札閣中舊版書極多因修錄其序跋及收藏家題識印記以資考證焉

天一閣金石目錄乃錢辛楣宮詹

大昕

修鄞縣志時

所編

鄞縣袁陶軒

鈞

工詩能古文專治鄭康成一家之學

余因擬岑南陽江上春歎詩識之陶軒於甬東耆舊詩文事蹟尤多掌錄故余錄兩浙詩於甬東最詳

擬岑南陽江上春歎

袁鈞

寂寞嘉州客春風又一年江花空自發江柳更誰憐飄落雲波闊枯榮歲序遷閒愁誰共遣芳草暗遙天

定海李巽占有孝行嘗授徒於某姓不食其晚餐葢家甚貧歸侍其母同食番薯不忍在館獨御稻肉也

又嘗受富家課子之聘既而知友人挾權力謀奪乃
固辭之終就其館穀之儉者其他行類此余曰此真
士也以孝廉方正薦之焦里堂有番薯吟一章紀其
事

番薯行

焦循

母食米兒食薯母心不豫母食薯兒食米兒能不
泣涕海水洶洶浪拍天中有斯人行獨賢使君與
金謝不受無名得此身之咎使君曰汝勿却姑買
市中珍歸爲賢母樂李生叩首納金去兩眼紛紛
淚如雨

慈谿鄭簡香

勳

乃曉行太守

梁

之元孫以曉行詩得

名朱竹垞檢討常贈以詩簡香以墨蹟示余余和之
有云別擬建堂尊二老竹垞經義曉行詩簡香因建
堂祀兩先生余爲書二老堂額秦小峴觀察爲文記
之簡香又畫二老重逢圖取竹垞別久重逢轉傾倒
詩意

鄞縣童萼君

槐

刻意爲文詩賦亦皆名雋余試甬上

雜詩最愛其桃花風細魚苗賤幅幅漁蓑入畫圖二
句饒有畫意

余於山陰童試得吳傑越海風潮詩灑然異之及唱

名乃十二齡童子也因以登臥龍山望會稽禹陵詩
面試之曰爾知此題難乎對曰難在兩地成一事耳
其首句云臥龍不化梅梁飛余拔之竝字之曰梅梁

越海風潮

吳 傑

秋波不合積飛雪怪底黿鼉眼前掣一綫潮來天
地青奔騰獨駕東風烈排山倒海雪花吐海若前
驅馮夷舞聲搖赭嶺翻雲車勢汨龕山震雷鼓素
車白馬空恨吞錢唐折向蕭山奔控弩將軍不敢
發掣鯨學士驚詩魂桐廬江上銷風雨輕帆平處
痕如縷飛濤雄壯能幾時何事怒心亘千古君不

見銀河之水靜無波洗盡兵甲滋嘉禾

登臥龍山望會稽禹陵

臥龍不化梅梁飛璫瓏佳氣騰翠微風雲萬里護
名鎮百神朝罷迴靈旗蒼松翠柏儼成列玉書金
簡精光結宛委山頭雷雨開窈碑亭下龍蛇掣岫
巉石氣涵餘青玉帛千重會大廷回首蓬萊舊城
闕鷗鵠啼破雲冥冥越王宮殿銷歌舞衰草荒煙
自終古瑯琊北徙爭中原一朝金玉藏黃土豈如
不封不樹明德馨馭下九龍臥風雨

蕭山王進士

宗炎

越中第一學人也其弟紹蘭文學

竝茂爲朱石君師所賞其學實出於宗炎宗炎子端
履頗傳家學熟於經疏有詩才嘗作乞巧絕句有云
願得巧如荷上露一回分散一回圓又試金銅仙人
辭漢歌奇麗頗似長吉

擬李長吉金銅仙人辭漢歌

王端履

漢家宮樹啼鴉急瓦當苔繡鴛鴦溼通天高闕日
瞳矐銅人獨背西風立西風吹老萬年枝猶憶銅
人初鑄時望氣迎來汾水鼎通燿拜罷竹宮祠上
陵霍霍磨刀吏豈有神仙妖妄耳古雲寶甕起狼
煙銅人淚滴金盤水許昌宮殿漳河船授禪碑前

露溢田願爲黃鵠三千歲移得金莖五百年甌裏
駝裝辭漢始躍入河流牽不起沒髻還揚砥柱波
題胸羞勒當塗字河上行人說未央摩挲故物總
淒涼他年銅雀風吹折空有三臺對夕陽

蕭山徐北溟

鯢

深於小學精審不苟王少寇

昶

段大

令

玉裁

皆深重之

蕭山傳學瀨老諸生也頗能數典文亦有法

余在紹興作焚香夜坐詩蓋別有所託也次日以此
題試士餘姚吳大本云一簾花影不宜夢半榻鬢絲
閒似禪顧廷綸云絳帳卽今聞衆妙幽齋誰與識清

嚴可謂各極機杼

焚香夜坐

顧廷綸

宵分何事下疎簾
愛護濃薰故故添
絳帳卽今聞衆妙
幽齋誰與識清嚴
閒依榻枕看茶鼎
自撥爐灰數漏籤
萬籟無聲人悄悄
半窗明月映茶奩

試擬陸劍南芳草曲
余最賞山陰謝照二句云一道
裙腰雙展齒和煙
和雨踏青來會稽
車同軌作亦多風
調同軌後改名雲龍照
又有題姚允在仙山樓閣
圖七古一篇極凌雲御風之致

擬陸劍南芳草曲

謝照

天涯無處無芳草芳草爭如故鄉好春風幾日到
湖頭定知綠徧方干島湖波蕩漾淨無塵畫舫輕
搖載酒人柳姑祠外虹橋畔幾疊青衫映繡茵此
際詩情近寒食萬里懷歸歸未得惟有縣州古驛
詩礙馬有情舊相識何時鑑水重徘徊柳絮含煙
桃葉開一道羣腰雙屐齒和煙和雨踏青來

車同軌

鏡湖湖上草萋萋三月黃鶯恰恰啼兩岸春風梅
墅外一堤濃露畫橋西清明時節千絲雨嫩綠初
翻鳴杜宇胡蝶雙飛踏馬蹄綠波碧色傷南浦門

草歸來日已斜踏青南陌輾香車裙腰一道湖南
路片片飛來有落花放翁五十猶豪縱錦城一覺
繁華夢鏡湖春色在誰家舊游欲說無人共快閣
書巢鏡水邊滿湖芳草發年年酒旗淺落春波影
詩卷遙收劍閣天美人已去空傷碧浣紗賸有溪
頭石東風抹地燕齊飛湖上三山務觀宅

題姚允在畫仙山樓閣圖

謝照

爛熳朱霞接天起皓鶴垂翎啄秋水方壺縹緲見
樓臺雲構瓊瓏碧空裏露壇月館仙所都丹砂爲
牀玉作鋪青鸞背滑控不得夢游要倩仙風扶十

二層城耀金碧斜曛半挂紗牕格松花滿地石泉
香如聽敲碁簾影隔瑤島春風吹不盡此中合貫
仙槎影流霞飽嚼挹天漿愛煞仙山樓閣靜圖成
簡叔妙煙巒濯魄冰壺絹素寒試向蓬萊尋舊侶
彩雲盤屈作闌干

顧廷綸

瓊樓十二紅闌干蓬萊水淺生微瀾采恩屈曲界
碁局珠簾不捲凝曉寒彈指雲煙麗金碧軟風吹
放星榆白芙蓉城闕仙官居廣寒宮殿嫦娥宅月
地雲階宛轉通銅鑲魚鱗啟玲瓏青鳥掌書鶴守

戶下界但見雲濛濛虹橋影落黃姑渡銀浦無聲
瀉珠露玉笙一曲隔花聽天雞叫醒扶桑樹偶從
瀛海泛枯槎知是仙山第幾家松陰滿地無人到
但有雙鬟掃落花

蕭山蔡應襄方干別墅云暮雨題詩客孤雲下第人
絕似三拜風調

山陰何起瀛長於駢儷之文鑣院試擬顏延年三月
三日曲水詩序及擬賀平苗表皆沈博絕麗於風簷
寸晷得之尤爲能事

擬顏延年三月三日曲水詩序

何起瀛

臣聞周公成洛流觴之典肇興秦王制西捧劍之神斯出昔摯虞之對非令節攸關繫東哲所言乃良辰由昉風俗相傳其來舊矣我大宋高祖武皇帝誕受天命撫有函夏度邑靜鹿邱之歎遷鼎息大垆之慙宮鄰昭泰荒憬牧寧東漸日域西被月髓南暨朱崖北訖天墟莫不樹頌蛾伏稽首來王我皇續承丕緒潤色鴻業興禮制樂登三咸五偃革辭軒銷金罷刃尚廉舉孝悌周官之典養老引年循王制之舊協律總章之司序倫正俗崇文成均之職道德齊禮挈壺宣夜辨氣朔於靈臺書笏

珥彤紀事言於仙室肺石無窮獨之民棘林少爭
訟之衆百辟師濟庶績其凝流大宋之愷悌盪亡
晉之毒螫是以耆年興衢壤之謠稚齒有含哺之
樂侮食來庭左言入侍髻首椎髻之邦重舌貫胸
之國鞮譯而至請受纓縻文鉞碧帑之琛奇幹善
芳之貢紈牛露犬之玩乘黃茲白之駟盈衍外府
充牣郊虞而況天瑞降地符生澤馬來山車出植
華平於春圃豐朱草於中唐雲潤星暉風揚月至
江海呈象龜龍載文淵乎鑠哉功旣成矣可以順
時應令作樂崇德也歟維莫之春粵上斯已桐華

鼠化萍生虹見采蘭殷鄭國之士求桑勤幽人之
女褻飲之日在茲風舞之情咸暢皇帝乃登玉輅
乘時龍鳳蓋琴麗和鸞雍容七萃連鑣九旂齊軌
魚甲煙聚貝胄星羅虎賁趨蹌翠華旖旎臨幸乎
樂遊之苑葆份陳階金匏在席召鳴鳥於弇州追
伶倫於嶰谷發參差於王子傳歌舞於帝江正樂
旣闋羽觴斯進臨水祓除與民同樂上有如天之
福下獻南山之壽有詔曰今日嘉會且饒二王凡
屬有位咸可賦詩竝命小臣作序爰拜手稽首以
誌其事云元嘉十一年三月三日太子中庶子臣

顏延年奉詔謹撰

會稽陶綬年四十與童子試苦吟越舟六詠屬稿畢而眞本未完日暮投卷出矣余以此六詩爲擅場招之再試則已廢然歸村居越日始至稿項黃馘不類其詩之韶秀也

越舟六詠

陶 綬

買道山陰入會稽畫圖行處櫓聲齊劃驚錦鬣翻
萍出撥訝晴虹飲練低兩岸柔風來翡翠半溪花
影浸玻瓈笑他欸乃清湘曲日暮煙沈泊大堤畫櫓
教簞編成當短篷濃雲淡墨潑來工螺痕浸處微

分碧漁火明時忽露紅客去岸邊鴉點點人來港

口雨濛濛最憐烏桕村前路泊盡斜陽又曉風鳥

竹竿籊籊纂頭施

施釘於竿首謂之鑽頭越音讀若纂

小泊當隄仗

汝持弄影不隨流水逝安眠方羨此君宜一篙魚

浪難勝處三月春流正穩時莫訝南人船似馬臨

波垂策莫狂颺

竹碇

波急灘懸路正遙海樓綯索曳條條曉霜貼岸幾

人影春水一肩何處潮宛轉客心縈錦纜滯淫鄉

思繫蘭橈自經戰雨搖風後蓑影鞦聲共汝描

樓纜

春波淼淼影徐徐尺布縫將錦不如山好忽驚遮

欲斷雲低偏信挂還虛潮平隔岸輕懸候風急危

檣半落初安穩行人定無恙來朝應報過江書

布帆

遮莫舟簾爲雨裁晴湖春泛一牕開波光倒碧涵

詩麓山色飛青落酒盃過眼忽驚雲似馬倚人宜

聽笛番梅莫嫌所見非空閣漏得斜陽八牖來

蓬牕

越舟六詠佳句甚多畫櫓則山陰沈王臣之最宜三

月浪不礙半江秋諸暨周桐之紋開新綠水聲隔小

紅橋新昌陳承然之花氣一奩搖曉鏡練痕雙綬落

春波烏簫則有沈王臣之浴爭鴉背淨糝受柳花輕

竹碇則有會稽胡佳之常教客夢通宵穩量取山光

隔岸齊樓纜則沈王臣之拖殘晨岸月界破晚湖煙
布帆則有蕭山陳應坡之不知春雨重但見遠山移
周桐之三分花月夜一幅水雲秋蓬牕則有沈王臣
之暗移春岸過虛受夕陽來

蕭山教諭俞

超

海寧人擬作樓纜詩云每值橫風日

猶思戰雨時諸人皆遜此渾脫

臨海洪頤煊震煊兄弟篤學士也余嘗謂台郡能讀
書者惟此二人台郡自齊次風侍郎之後能學者甚
寡頤煊震煊文采詞翰或未足而精研經訓熟習天
算貫串子史實有過於侍郎之處台人聞之以爲詫

淮南子云以籌測江籌終而以水爲測惑矣

余於天文算法中求士如臨海洪頤煊震煊歸安丁傳經授經錢唐范景福海鹽陳春華等皆有造詣然以臨海周治平爲最深治平拙於時藝久屈於童子試余至台州治平握算就試特拔入學治平精於西人算術通授時憲諸法明於儀器余有詩云中法原居西法先何人能測九重天誰知處士巾山下獨閉空齋畫大圓

處州山川險阻人物樸陋掄才者至此鮮不廢然矣余試青田畫虎賦得端木子舜

國瑚

才調斬新得六

朝眞意歸語秦小峴觀察曰此青田鶴也檄之來杭州讀書敷文書院貧不能自給以鶴訴篇陳觀察余乃命之居西園使得壹志於學學日益進天台雁蕩諸詩尤極奇麗武進陸邵聞通耀于時賢罕所折服獨於子彝心折焉余有句云誰是齊梁作賦才定香亭上碧蓮開括州酒監秦淮海招得青田白鶴來

鶴訴篇

端木國瑚

仙人下太清種芝香滿閣鸞鳳已成羣遠招青田鶴翩然鶴西來羽毛何蕭索處之玉池頭雲水隨所託萍花晚不生菱葉秋更落蒼苔入夢寒白雪

憐影薄奇氣鬱青霞瘦立驚非昨翹頂問仙人敢
訂餐霞約丹還玉帳深慨想爐中藥

秦小峴觀察試敷文書院木棉花詩國瑚有句云詩
人菴老吟何苦游子衣寒綻可憐最爲雅切

試紹興以雲漢賦命題少厭心之作因命鄞縣童萼
君槐青田端木子彝國瑚撰之竝極壯麗槐有云何

日倒傾滄海匯爲天上文瀾有時瀉落青霄流作人
間璧水國瑚有云秋泛一槎耿耿聞仙家耕織如常
春涵雙劍沈沈知武庫兵戈不玩

金華土田沃衍民俗淳樸士雖未文然亦不陋讀書

負耒尚有四先生遺風其士之佳者則有東陽盧炳
濤永康潘國詔東陽徐大酉浦江張汝房盧炳濤擬
題崔白健翮鏐風圖詩云高秋試向雪壁懸直似秦
兵能苦戰張汝房云平蕪搏擊灑毛血直以六翮爲
六軍潘國詔云畫風得勢先畫木萬竅刁調皆怒號
收縮遠勢歸咫尺匹練有似蒼天高徐大酉自公堂
後雙古柏詩云參天倚地榦如鐵崛然孝子忠臣節
雪花已試歲寒心獨飽風霜看橫絕

金華試院宋自公堂後雙古柏

阮元

自公堂後雙古柏六百餘年老宋客蟠根想已透

重泉生氣勃然出堂脊一株轆轤紋節轉一株皮
厚腹中塲等間鶯燕不敢來絕頂花雕刷寒翮瓦
溝殘日落青子蒼鼠奮髯噉其液此堂支柱多古
礎乾道七年魏王宅湯陰惡檜剝不盡鞏洛松楸
種何益此柏幸栽節度家頗有清香凝畫戟徒恨
苔身長百尺未與冬青樹爭碧堂陰誰可話疇昔

六碑首問熙寧石

堂後有石碑
六皆兩宋物

開化山邑荒陋然地接婺源頗有實學之士戴金溪

太史

敦元

少負神童之目此後有張立本者叩以說

苑列女傳白虎通釋名諸書皆貫穿而發明之年未

及冠所至似未可限量

黃巖施彬經史皆能背誦余嘗試以列代臨雍考於二十一史中舉行典禮徵引極爲詳贍

浙東西兄弟皆才者二洪之外則有丁小雅杰之二

子授經傳經博學多聞有父風邵二雲學士之二子秉衡秉華竝傳家法兼通經史歸安邵保初及弟保和少年能文竝通經術烏程周中孚博聞強記而文筆甚拙其弟聯奎能詩文而疏於經術然亦可謂二難矣

平湖朱椒堂

爲弼

通經學兼長詞翰成童喪父其祖

舍叔以兄事牽累羈成都獄待質三十餘年始歸旋
卒椒堂事祖母高母吳克盡孝養撫諸弟讀書皆成
立方蘭士爲寫慈竹居圖余題之云冊載玉關淚飲
冰寒自知艱難貞苦節突兀見孫枝不盡報劉意猶
憐說項遲春陰覆慈竹爲詠少陵詩